

QVÆSTIO MEDICA.

Quodlibetariis disputationibus manè discutienda in Scholis Medicorum, die Jovis 15. Januarii.

M. ANTONIO DE CAEN, Doctore Medico, Præside.

Suntne tam varia Morborum, quam agrorum facies?

HOMO, homini quid intersit, non omnes tenent. Alterum ab altero ex facie internoscere cuius vel bardo promptum est: assequi etiam, quod ad communem omnium naturam pertinet, potest vel mediocriter eruditus: Uniuscujusque verò propriam introspicere, pervidere, omnique ex parte exploratam habere, ne quidem factus ad unguem Medicus. Ferè nimirum Vulpeculæ similes, lambimus vitreum vas, pultem haud attingimus. Expediat aliquis, ex quo, sedentibus in concilio cordatis viris, tanta sit de re unâ opinionum disjunctio; Unde tam varii palati convivæ poscant tam diversa; Quamobrem aliqui carnes, pisces alii, nonnulli vinum tantoperè oderint; Contrà hujus dulcedine capti plurimi haud aliud vitæ præmium intelligant; Cur ille ad casei, hic ad leporis, is ad rosæ conspectum cohorrescat & contrahatur. Quâ de causâ iste est adeò projectus in Venerem, in quam hic oris floriduli, florentisque ætatis, ac corporis, omnino friger? Quâ vi, dum sonum reddit pulsata Cithara, illi uni lotium invito exprimit?

TOT varietatum, effectuumque dissidentium causa eadem quæ sanitatis, & morborum; partium videlicet consimilium temperies, organicarum conformatio, omniumque positus, & confociatio singularis. At enim, velut è paucis numero litteris variè inter se compositis, ingens nascitur vocabulorum multitudo; ita è paucioribus partibus tam discrepantes, quàm infinitæ, hominum facies effinguntur: quin è paucissimis elementorum qualitatibus tot exurgunt temperationum, quot hominum formæ, illarum effectrices rerum, quas admirari aliquantò facilius sit, quàm enodare. Nec aliunde profectò est, quòd nunc mas, nunc fœmina prodit in vitæ scenam: quòd stabilis constansque est unius valetudo, alterius prorsus vitrea æquè, splendens ac fragilis; quòd in aliquibus nihil in victu delinquentibus, angustioris vitæ flosculus decurrit quàm celerrimè; aliis diutius in eâ manentibus; propter ipsam quoque rem, venientes ac recedentes anni multa secum ferunt commoda & incommoda.

PAR ratio invaletudinum tribus summis temperiei, conformationis, continuationisve partium violatæ generibus contentarum; à quibus, nisi qui ad curandum accedit, descendat per subjectos gradus ad infima, sua ipsi ars inanis futura est, quamvis ad manum sint omnia, quibus morbus æger debet oppugnari, præsidia. Plane ut unus ille sanos homines perfectos habet, cui, quid commune sit omnibus, quid proprium singulis, penitus notum est: ita is tantum eximie medentis personam sustinet, qui communem ac totam morbi cuiusque notionem, insuperque singularia illa, quæ in nullum alium convenire possunt, gerit in animo consignata; cui, non modò inchoata, sed præstans ac difficilis similitudinum etiam peritis imponentium, atque dissimilitudinum intelligentia res competas efficit. Vis illud in apertam lucem vocatum ante oculos tibi statuere?

LATE fsum febris nomen (ut inde specimen capiatur) sit licet ad eam quæ quartâ quaque luce torret, contractum; adhuc vana est imago morbi, cuius mille discrimina: quapropter cave de illius moribus, exitu, & curatione quidquam ante proferas, quam liqueat, sit domesticus, necne; quâ parte anni; quo domestico more degentem corripuerit; tenuis, an firmæ valetudinis hominem, puerum, juvenem, annosumve senem; ocio disfluentem, an curis, aut labore confectum exerceat; quo sub cælo natus, educatusque sit; quale solum calcet; quem ore ducat ærem; quibus se pascat cibus. Neque hinc consistendum: ipsa quippe, quæ febrem circumstant mala, ejus quoque produnt ingenium; scire ut permagni referat, paucarum sit, an multarum horarum, sub eâne integra sint, an corrupta, aut effusa viscera; num vomitus, tussisque ægrum quatiant; fusior sit, subsistatne alvus; adsint sitis, sudor, vigilæ; an contra veternus occupet. Quæ quidem omnia, ut in hominum genus universum cadere queant, nullo non variantur in corpore.

QUAM dispar itaque sanorum hominum constitutio, temperies, natura, & indoles; tam dispares ægrotorum, morborumque formæ ac species: simili modo, quàm multiplex ac diversa latentium intus humorum conditio, tam dissimilis inde exortarum ægrotationum ratio. Hinc tantus labor, totque exorbendæ difficultates ritè medendi scientiam professo: ut, nisi hæc singula venerit, & intento animo cernat, agiter, atque ad invicem comparet, suum cuique malo remedium aptaturus, Medici titulum temerè sibi arroget: in ultimas verò terras exportandi sint eorum omnium rudes isti homunciones, veriùs fungi, qui naturæ quoque totius ignaros homines, sapiùs magnas inter opes à rectâ mente inopes perniciosè ludificant, unico adversus qualibet ægri tudines nunquam non usi pharmaco.

Ergo tam varia morborum, quam agrorum facies.

Domini Doctores disputaturi.

M. Claudius Berger.
M. Claudius Blendisant.
M. Dominicus de Farcy.

M. Henrius Mahien.
M. Claudius Guen.
M. Paulus Maitre.

M. Alanus Lamy.
M. Claudius Quartier, Censor Academiæ.
M. Antonius Bourgaud.

Proponerat Parisiis FRANCISCUS MAILLARD, Parisinus, Baccalaureus Medicus. A. R. S. H. 1682.

